



PARTORDING NI PARTANGIANGAN BUHABUHA IJUK



**HURIA KRISTEN BATAK PROTESTAN
DISTRIK XVIII JABARTENGDIY**

Minggu, 04 April 2021, Pukul 05.00 Wib

01. Patujolo : (U = Uluan; H = Huria)

U : Huria ni Tuhanta, ro do hita nuaeng tu bagas joro di manogot on, ala na marningot hita di haheheon ni Tuhan Jesus Kristus sian na mate.

Alai di buhabuha ijuk, di ari parjolo dung salpu Sabbat i, ro ma si Maria Magdalena dohot si Maria na sada maningkir tanoman i. Alai nunga masa lalo na gogo. Ai tuat do surusuruan ni Tuhan sian banua ginjang; jala dung sahat, digulang ma batu i, laos hundul diatasna. Alai songon hilap do rupana idaon, saksak do ulosna songon hapur.

H : **Jadi angka dotdot ma parjaga i dibahen biar ni rohanasida, hira na mate do.**

U : Alai ninna surusuruan i ma mandok parompuan i: Unang hamu mabiar, ai huboto, dilului hamu do Jesus, naung diparsilangkan. Nandang dison Ibana.

H : **Ai nunga hehe Ibana, songon na nidokNa hinan.**

U : Pajonok hamu ma; ida hamu ma inganan hapeahanna i! Hatop ma hamu laho tu angka siseanna i paboahon, naung hehe Ibana sian na mate, jadi joloananNa do hamu tu Galilea, disi ma idaonmuna Ibana; nunga hupaboa i tu hamu. Dungi hatop ma nasida laho sian tanoman i, mabiar huhut las situtu rohanasida; marlojong do nasida laho mamaritahonsa tu angka siseanna. ***Tahatindanghon ma haheheonNa i marhite Endeta. Marende ma hita paboahon haheheon ni Jesus i.***

H : **Marende BE No. 627 : 1, 2 “Jesus Naung Hehe” BL. 627**

Jesus naung hehe, Haleluya; Puji endehon, Haleluya. Hamonangan ni Tuhanta i na manaluhon sibolis i. Las ma roham puji ma Tuhan i ala naung talu hamatean i. Sesa dosanta, Haleluya; mangolu Jesus Haleluya.

---(Jongjong)---

Di ari patoluhon i maloha do tanomanNa i. Jesus Raja hangoluan i, na patundukhon sibolis i. Las ma roham puji ma Tuhan i ala naung talu hamatean i. Sesa dosanta, Haleluya; mangolu Jesus Haleluya.

02. VOTUM-INTROITUS-TANGIANG

U : Marhitehite goar ni Debata Ama dohot goar ni AnakNa Tuhan Jesus Kristus dohot goar ni Tondi parbadia na tumompa langit dohot tano on.

H : Amen

U : Unang ho mabiar, Ahu do bonana dohot ujungna. Na mangolu do, jala naung mate do Ahu najolo, jala ida ma, Ahu do na mangolu ro disaleleng ni lelengna, jala di Ahu do anakhinsu ni banua toru dohot hamatean.

H : Nunga hehe Kristus i sian na mate, Ibana do parjolo ni angka na monding i.

U : Martangiang ma hita : Ale Tuhan Debata, Parasiroha na sumurung! Didok HataM do, ingkon manaon hami jala mate rap dohot Tuhan Jesus Kristus, asa rap hami dohot Ibana tu hasangapon. Sai parrohai ma hami, asa unduk hami tu lomo ni rohaM jala hot hami di haporseaon na ture asa tongtong mangkirin di haheheon dohot di hasangapon sogot silehononMu tu angka na porsea di Ho. Amen.

(Hundul)

03. MARENDE BE No. 92 : 1, 3 “Puji ma Namanaluhon“ BL. 178

Puji ma na manaluhon dosa hamatean i

Puji ma na pangoluhon saluhut pardosa i

Jesus na dung mate i las roham o huriaNa

Ala na mamillit ho Jesus i mangolu do

I do las ni rohanami lao mamujimuji Ho.

Ndang be sitoruan hami, ala na dung mate Ho.

Dungkon ni mangolu Ho nunga ringan tondinami.

Sian hangoluanMi ala hamonanganMi.

04. EPISTEL

U : Hata ni Debata, turpuk Epistel di parpunguan buhabuha ijuk manogot on, ima na tarsurat di Rom 6:3-11, tajaha ma secara responsorial! Na so diboto hamu do on: Sude hita, nasa naung tardidi tu bagasan Kristus Jesus, tu bagasan hamateanNa do hita tardidi?

H : Antong, naung tartanom do hita rap dohot Ibana marhitehite pandidion i tu bagasan hamatean, asa marparange hita di bagasan ngolu na imbaru, songon Kristus naung hehe sian angka naung mate hinorhon ni hasangapon ni Amana.

U : Ai anggo nunga sanghambona hita dohot Ibana, di na rap mate hita dohot Ibana i, suang songon i ma hita nang taringot tu haheheon.

H : Ai taboto do: Nunga tarsilang hadirionta na buruk raphon Ibana, asa pinasohot daging pardosaon, asa unang be hita mangadop di dosa.

U : Ai dung mate jolma, lias do ibana sian dosa.

H : Alai molo naung mate hita rap dohot Kristus, dihaporseai rohanta, rap mangolu ma hita dohot Ibana.

U : Ai taboto do, na so mate be Kristus, dung mulak mangolu sian na mate; ndang dirajai hamatean i be Ibana.

H : Ai mate pe Ibana, sahali do i, ala ni dosa; ia mangolu nuaeng, di Debata do i.

U : Suman tusi ma rajumi hamu dirimuna songon naung mate di dosa i, alai mangolu di Debata di bagasan Kristus Jesus. Ido sahatna, Martua do angka na tumangihon hata ni Debata jala na umpeopsa! Amen.

05. MARENDE BE No. 93 : 3 “Pesta Paska Hatuaon” BL. 91

*Tuhan Jesus do na monang, Tuhan Jesus do pasuang,
Las ni roha dame pe, las ni roha dame pe,
Dongan golom ma hataNa, Na porsea di Ibana; Ndang tarbagen mago be.*

06. JAMITA : 2 Korint 4 : 14

**07. MARENDE BE No. 94 : 1, 3 “Ale Tondingku, naung hehe” BL. 44
(Papungu Pelean)**

*Ale tondinghu, naung hehe Tuhanmu, Nunga ditaban do banua toru.
Las ma roham ai martua ma ho, Rap dohot Jesus mangolu ma ho,
Rap dohot Jesus mangolu ma ho.*

---(Jongjong)---

*Tahaburjuhon mangalo dosanta, Jala tabaen Tuhan Jesus donganta.
Pos ma rohanta di Tuhantai, PamonangonNa do hita sude,
PamonangonNa do hita sude.*

08. PARSURUON

U: Nunga hehe Jesus

H: Alani, hehe do hami laho mamaritahonsa marhite na manadinghon saluhut angka biar ni rohanami, asa marhiras ni roha hami di bagasan Ibana, Mual ni Hangoluan si salelengnilelengna i.

U: Nunga monang Ibana manaluhon hamatean!

- H: HamonanganNa i do na mangalehon di hami panghirimon na mangolu di nasa parsorion jala manatap ma hami tu jolo so diihoti ragam ni parungkilon dohot hasusaan na di portibi on.
- U: HamonaganNa i ma na margogoihon hami manghatindanghon Ibanan tu sandok portibi on.
- H: HamonanganNa i do na gabe hamonangan ni saluhut angka na porsea, hamonangan ni hatigoran dohot hasintongan, hamonangan ni saluhut ulaon laho patingkoshon uhun tu angka na metmet jala na dangol; jala loas ma hami gabe parsidohot di saluhutna i.
- U: Nunga marpadan be hamu dohot Debata, alani laho ma hamu, ulahon hamu ma i, dibagasan gogo na sian Tuhanta i.

09. TANGIANG PANUTUP

Praeses
HKBP Distrik XVIII Jabartengdiy,
Parhobas Distrik,
dohot
Sude Pangula Na Gok Tingki
HKBP Distrik XVIII Jabartengdiy
Pasahathon

TABE & SELAMAT PASKAH

Tu

Sude Parhalado

dohot Ruas ni HKBP Sa-Distrik XVIII Jabartengdiy :

HKBP Ressort

**Bandung Riau Martadinata, Jawa Tengah, Bandung Timur,
Cimahi, Purwakarta, Yogyakarta, Bandung Barat, Pekalongan, Cilacap,
Cirebon, Cimahi Jln Sisingamangaraja, Brebes, Karawang, Tasikmalaya,
Bandung Tengah, Semarang, Subang, Solo, Cikampek, Persiapan Resort
Betesda Baleendah.**

Shalom.